

Davon soll berichte gethan werden: Unser lieber **h e r r**
Christus/ gebe vns allen seine Göttliche Gnade vnd Segen von
Himmel/ daß sein Wort/ das aus seinem Munde gehet/ nicht leer
wider kömme / Sondern/ daß es in euch vnd vns allen ausrichte
tet/ wozu ers sendet / Der da lust hat an vnser Seligkeit/ durch
des heiligen Geistes gnedige erleuchtung vnd Göttlichen bey-
stand/ Amen.

Erklärung des fürgenom- menen Stückes.

Wir haben eine Schiffahrt in dem heutigen
Evangelio/ da der **h e r r** Christus mit seinen Jüngern
auff den Meer fehret. Es begibt sich aber/ daß grosse
Winde auffstehen/ die das Meer so vngestümb/ vnd ein solch wes-
sen auff den Wasser machen/ daß das Schifflein hin vnd wider
geschlagen wird / vnd die Wasserwellen auff dasselbe daher fal-
len/ vnd sie alle da in grosser Leibes vnd Lebens gefahr schweben.
Vnd weyl der **h e r r** Christus vnter deß im Schiff liget vnd
schlefft / so wecken ihn die Jünger auff / schreyen vnd beten/ Er
wolle ihnen hülffe schaffen/ wenn sie nicht verderben sollen. Das
thut der **h e r r** Christus / stehet auff vnd bedrawet den Wind
vnd das Meer/ daß sich alles legt vnd stille wird. Vber dem gros-
sen Zeichen/ müssen sich alle im Schiff verwundern/ vnd frage
einer den andern/ in welcher Frage auch der Zweck ist des heutigen
Evangelij/ den wir auff dißmahl zu sehen vnd zu lernen/ vns ha-
ben fürgenommen/ Nemblich:

Was ist das für ein Mann/ daß ihm Wind
vnd Meer gehorsam ist?

Der **h e r r**
Christus ist
ein Man. 1.

Antwort: Es ist ein Mann/ ein rechter/ wahrer/ natürlicher wegen seiner
Mensch/ wie vnser eines/ doch ohne Sünde/ sonst ein rechter wahrer Menschli-
cher natur.